

戒殺放生集

戒殺放生集

附素食
主義

戒殺放生叢書之一

世界佛教居士林印行



本集提要

是却病之良方是延年之捷徑
 是孝親之正道是得子之助緣
 是植福之指南是弭兵之要著
 是超凡入聖之正因
 人生入世苟無緣讀此至文其
 不爲滔滔業海中萬劫沈淪之
 種子也亦鮮矣有力者印施流
 通有心人方便宣說得福之多
 且大豈得以尋常數字計之哉
 無相行者

民國二十年二月二十版

戒殺放生叢書之一

戒殺放生集

編纂者 李證性居士

印送者 上海開北新民路
 世界佛教居士林放生會

流通者 上海佛學書局
 總店——開北新民路

印刷者 國光書局
 分店北火車站東首寶山路口
 上海新大沽路六七一號

電話三三七四三號

索閱祈付郵票一分多則遞加
 如蒙捐助本冊印費每本大洋一角作
 爲續印之需以期陸續印行源源流通
 則功德無量矣

戒殺放生集序

江謙

慈悲愛物之旨。古今諸聖賢。啓信勸善。已至詳盡。世之昧者。囿於俗習。明者果於自信。斥正教爲異端。鄙仁道爲迂見。究之因果不爽。業報難逃。一治一亂。說者以爲天道之循環。不知古大德所謂欲知世上刀兵劫。試聽屠門夜半聲。承平之世。驕奢淫佚。已植其因。積而久之。必收其果。曾子所謂出乎爾者。反乎爾者也。當今時局。蝸蟻生民塗炭。羣然屬望於世。所謂爲聰明才智者。以圖救濟。曲突徙薪之不用。而焦頭爛額以爲功。不知種種政策。頭痛醫頭。腳痛醫腳。未能明乎癥結所在。詎有甚良之效果乎。夫放生戒殺。夫婦之愚與知焉。而士大夫以爲迂。誠能平心靜氣以察之。則知止沸抽薪。不無善策。繫鈴解鈴。還在當人。與其致力於科條之粗迹。反益糾紛。何如黽勉於食飲之幾微。隱增福德。戒殺實爲先務。而已往之愆。非善莫贖。則放生尤爲重要。或自作。或勸人。以增進善因。匪特可以消除災禍。且有不可思議功德。或獲世間之福報。或種出世之因緣。存乎其人耳。再進而人人能守十戒。行十善。則佛氏所謂人民以善業自衛國家。與今歐西之妄想民治主義。固不可同年而語矣。是則茲編之印布。自度度人。救世之福因。而又爲眞民治之嚆矢也。

中華民國甲子孟冬婺源江謙謹識

戒殺放生集弁言

今夫好生而惡死者。物類之同情也。趨吉而避凶者。羣衆之心理也。體上天好生之德而愛惜生命者。天必錫之以福。味慈悲之旨而恣意殺生者。天必降之以災。此一定之理也。世人每以口腹之細故。而釀殺生之重罪。殊不知朵頤一快。卽是無數生物死亡痛苦之代價。逞三寸舌根之欲。結萬劫不解之讐。其背理傷仁。喪心忍性。爲何如乎。惡業旣深。惡報難逃。眼前則兵匪劫慘。彈雨鎗林。身後則地獄苦多。刀山劍樹。試觀披毛戴角之倫。悉是負債含冤之輩。因果之理。毫髮不爽。輪迴之報。輾轉難免。靜言思之。甯不危懼。慨夫世人於不知不覺中。造莫大之罪業。相沿成習。恬不爲怪。便於不知不覺中。感無窮之苦報。其情可原。其愚可憫。不得不藉醒世之鐘。覺民之鐸。以發瞶振聵。則有賴於我佛戒殺放生之明訓矣。夫殺生爲諸惡之首。放生爲衆善之先。故戒殺放生。爲修行要素。我人豈可不加諸意乎。方今時局阡危。干戈擾攘。莫不由衆王惡業之所感。誠欲挽回劫運。匡救人心。非宏揚佛化不爲功。故本林對於宏法事業。努力進行。而放生會尤爲林務之亟。因欲使人人明於戒殺放生之眞義。而勇於戒殺放生之實行。於是有戒殺放生集之編。是集

也。首引楞伽斷肉品。金口誠言。藉資啓信。次列雲棲放生儀。精心密意。俾便遵行。更爲曲引釋儒諸名賢之偉論。是非明理。理趣洞明。問答釋疑。疑團冰釋。提倡素食主義。爲饕餮者下針砭。附列勸戒願編。爲好殺者垂炯戒。庶幾閱是編者。因文見道。觸目驚心。共懷殺生之戒。同行放生之慈。輾轉勸化。遠近流通。以使信受奉行。自他咸植菩提之種。利生益物。物我同登仁壽之鄉。是則本林編是集之微意焉。

癸亥仲夏世界佛教居士林編輯處

緊要聲明

本林爲闡明戒殺放生之意義。使人人知戒殺放生之重要。故特印戒殺放生集。重印聖師錄。放生殺生現報錄。三種。以資流通勸化。卽於本林放生會中。撥款印刷。此則明其理。放生則行其事。事理相應。功德正同。且因勸化而發心者衆。則功德尤勝矣。此舉想必爲好善諸君子所贊許也。伏希垂諒。

世界佛教居士林戒殺放生會謹啓

戒殺放生集目錄

弁言..... H Y

大乘入楞伽經斷食肉品.....

放生儀軌.....

蓮池戒殺放生文註..... 蓮池大師

放生文..... 蓮池大師

素食肉食比較談..... 妙圓居士

戒殺四十八問..... 萬善先資集

答放生或問十則..... 范古農

好生決疑門十六則..... 佛學撮要

萬善先資因果勸..... 周安士

好生救劫編撮要..... 好生救劫編

素食主義..... 丁福保

勸戒錄戒殺編節錄..... 勸戒錄類編

大乘入楞伽經斷食肉品

唐于闐國三藏沙門實叉難陀譯

爾時大慧菩薩摩訶薩復白佛言。世尊。願爲我說。食不食肉功德過失。我及諸菩薩摩訶薩。知其義已。爲未來現在報習所熏。食肉衆生而演說之。令捨肉味。求於法味。於一切衆生起大慈心。更相親愛。如一子想。住菩薩地。得阿耨多羅三藐三菩提。或二乘地。暫時止息。究竟當成無上正覺。世尊。路伽耶等諸外道輩。起有無見。執著斷常。尙有遮禁。不聽食肉。何況如來應正等覺。大悲含育。世所依怙。而許自他俱食肉耶。善哉。世尊。具大慈悲。哀愍世間等觀衆生。猶如一子。願爲解說。食肉過惡。不食功德。令我及與諸菩薩等。聞已奉行。廣爲他說。爾時大慧菩薩重說頌言。

菩薩摩訶薩

志求無上覺

酒肉及與葱

爲食爲不食

愚夫貪嗜肉

臭穢無名稱

與彼惡獸同

云何而可食

食者有何過。

不食有何德。

唯願最勝尊。

爲我具開演。

爾時佛告大慧菩薩摩訶薩言。大慧諦聽諦聽。善思念之。吾當爲汝分別解說。大慧。一切諸肉。有無量緣。菩薩於中。當生悲愍。不應噉食。我今爲汝說其少分。大慧。一切衆生。從無始來。在生死中。輪迴不息。靡不曾作父母兄弟。男女眷屬。乃至朋友。親愛侍使。易生而受鳥獸等身。云何於中。取之而食。大慧。菩薩摩訶薩。觀諸衆生。同於己身。念肉皆從有命中來。云何而食。大慧。諸羅刹等。聞我此說。尙應斷肉。况樂法人。大慧。菩薩摩訶薩。在在生處。觀諸衆生。皆是親屬。乃至慈念。如一子想。是故不應食一切肉。大慧。衢路市肆。諸賣肉人。或將犬馬人牛等肉。爲求利故。而販鬻之。如是雜穢。云何可食。大慧。一切諸肉。皆是精血汙穢所成。求清淨人。云何取食。大慧。食肉之人。衆生見之。悉皆驚怖。修慈心者。云何食肉。大慧。譬如獵師及旃陀羅。捕魚網鳥。諸惡人等。

狗見驚吠。獸見奔走。空飛水陸一切衆生。若有見之。咸作是念。此人氣息。猶如羅刹。今來至此。必當殺我。爲護命故。悉皆走避。食肉之人。亦復如是。是故菩薩爲修慈行。不應食肉。大慧。夫食肉者。身體臭穢。惡名流布。賢聖善人。不用親狎。是故菩薩不應食肉。大慧。夫血肉者。衆仙所棄。羣聖不食。是故菩薩不應食肉。大慧。菩薩爲護衆生信心。令於佛法。不生譏謗。以慈愍故。不應食肉。大慧。若我弟子。食噉於肉。令諸世人。悉懷譏謗。而作是言。云何沙門。修淨行人。棄捨天仙所食之味。猶如惡獸。食肉滿腹。遊行世間。令諸衆生。悉懷驚怖。壞清淨行。失沙門道。是故當知。佛法之中。無調伏行。菩薩慈愍。爲護衆生。不令生於如是之心。不應食肉。大慧。如燒人肉。其氣臭穢。與燒餘肉等。無差別。云何於中有食不食。是故一切樂清淨者。不應食肉。大慧。諸善男女。塚間樹下。阿蘭若處。寂靜修行。或住慈心。或持咒術。或求解脫。或趣大乘。以食肉

故一切障礙。不得成就是故菩薩欲利自他。不應食肉。大慧。夫食肉者。見其形色。則已生於貪滋味心。菩薩慈念一切衆生。猶如己身。云何見之。而作食想。是故菩薩不應食肉。大慧。夫食肉者。諸天遠離。口氣常臭。睡夢不安。覺已憂悚。夜叉惡鬼。奪其精氣。心多驚怖。食不知足。增長疾病。易生瘡癰。恆被諸蟲之所咬食。不能於食。深生厭離。大慧。我常說言。凡所食噉。作子肉想。餘食尙然。云何而聽弟子食肉。大慧。肉非美好。肉不清淨。生諸罪惡。敗諸功德。諸仙聖人之所棄捨。云何而許弟子食耶。若言許食。此人謗我。大慧。淨美食者。應知則是秔米粟米。大小麥豆。酥油石蜜。如是等類。此是過去諸佛所許。我所稱說。我種姓中。諸善男女。心懷淨信。久植善根。於身命財。不生貪著。慈愍一切。猶如己身。如是之人。之所應食。非諸惡習。虎狼性者。心所愛重。大慧。過去有王名師子生。耽著肉味。食種種肉。如是不已。遂至食人。臣民不堪。悉皆

離叛亡失國位。受大苦惱。大慧釋提桓因。處天王位。以於過去食肉餘習。變身為鷹。而逐於鵠。我時作王。名曰尸毗。愍念其鵠。自割身肉。以代其命。大慧。帝釋餘習。尚惱衆生。况餘無慙。常食肉者。當知食肉。自惱惱他。是故菩薩不應食肉。大慧。昔有一王。乘馬遊獵。馬驚奔逸。入於山險。既無歸路。又絕人居。有牝師子。與同遊處。遂行醜行。生諸子息。其最長者。名曰班足。後得作王。領七億家。食肉餘習。非肉不食。初食禽獸。後乃至人。所生男女。悉是羅刹。轉此身已。復生師子。豺狼虎豹。鵬鷖等中。欲求人身。終不可得。况出生死涅槃之道。大慧。夫食肉者。有如是等無量過失。斷而不食。獲大功德。凡愚不知如是損益。是故我今爲汝開演。凡是肉者。悉不應食。大慧。凡殺生者。多爲人食。人若不食。亦無殺事。是故食肉。與殺同罪。奇哉世間。貪著肉味。於人身肉。尚取食之。况於鳥獸。有不食者。以貪味故。廣設方便。置羅網罟。處處安施。水陸飛

行皆被殺害。設自不食。爲貪價直。而作是事。大慧世復有人。心無慈愍。專行慘暴。猶如羅刹。若見衆生。其身充盛。便生肉想。言此可食。大慧世無有肉。非是自殺。亦非他殺。心不疑殺。而可食者。以是義故。我許聲聞食如是肉。大慧未來之世。有愚癡人。於我法中。而爲出家。妄說毗尼。壞亂正法。誹謗於我言。聽食肉。亦自曾食。大慧我若聽許聲聞食肉。我則非是住慈心者。修觀行者。行頭陀者。趣大乘者。云何而勸諸善男子及善女人。於諸衆生。生一子想。斷一切肉。大慧我於諸處。說遮十種。許三種者。是漸禁斷。令其修學。今此經中。自死他殺。凡是肉者。一切悉斷。大慧我不曾許弟子食肉。亦不現許。亦不當許。大慧凡是肉食。於出家人。悉是不淨。大慧若有癡人。謗言如來聽許食肉。亦自食者。當知是人惡業所纏。必當永墮不饒益處。大慧我之所有諸聖弟子。尚不食於凡夫段食。况食血肉不淨之食。大慧聲聞緣覺及諸菩薩。尚唯

法食。豈況如來。大慧。如來法身。非雜食身。大慧。我已斷除一切煩惱。我已洗滌一切習氣。我已善擇諸心智慧。大悲平等。普觀衆生。猶如一子。云何而許聲聞弟子。食於子肉。何況自食。作是說者。無有是處。爾時世尊重說頌言。

悉曾爲親屬

衆穢所成長

恐怖諸含生

是故不應食

一切肉與葱

茱蒜及諸酒

如是不淨物

修行者遠離

亦常離麻油

及穿諸孔牀

以彼諸細蟲

於中大驚怖

飲食生放逸

放逸生邪覺

從覺生於貪

是故不應食

邪覺生貪故

心爲貪所醉

心醉長愛欲

生死不解脫

爲利殺衆生

以財取諸肉

二俱是惡死

死墮叫喚獄

不想不教求

此三種名淨

世無如是肉

食者我訶責

更互相食噉

死墮惡獸中

臭穢而顛狂

是故不應食

獵師旃荼羅

屠兒羅刹輩

此等種中生

斯皆食肉報

食已無慚愧

生生常顛狂

諸佛及菩薩

聲聞所嫌惡

象脅與大雲

涅槃央掘摩

及此楞伽經

我皆制斷肉

先說見聞疑

已斷一切肉

以其惡習故

愚者分別妄

如貪障解脫

肉等亦復然

若有食之者

不能入聖道

未來世衆生

於肉愚癡說

言此淨無罪

佛聽我食等

淨食尙如藥

猶如子肉想

是故修行者

知量而行乞

食肉背解脫

及違聖表相

令衆生生怖

是故不應食

安住慈心者

我說常厭離

師子及虎狼

應共同遊止

若於酒肉等

一切皆不食

必生聖賢中

豐財具智慧

放生儀軌

法師於放生處設香案。淨水楊枝。衆等以慈眼視諸衆生。念其沉淪。深生哀憫。復念三寶有大威力。能救拔之。作是觀已。手執水盂。默念想

云。一心奉請十方慈父。廣大靈威觀世音菩薩。降臨道場。加持此水。具大功勳。灑霑異類。令彼身心清淨。堪聞妙法。舉讚

楊枝淨水。徧灑三千。性空八德利人天。福壽廣增延。滅罪除愆。火焰化紅蓮。

南無清涼地菩薩摩訶薩三稱。將淨水三灑之。再舉。

南無大悲觀世音菩薩。三稱。大衆持大悲呪三遍。心經一卷。往生呪三遍。舉。

南無甘露王菩薩。三稱。拈香啓請

香花迎。香花請。南無一心奉請盡虛空徧法界十方常住佛法僧三寶。

三請。執手。爐白云。

仰白。

十方三寶。釋迦本師。彌陀慈父。寶勝如來。觀音菩薩。流水長者子。天台永明諸大士等。惟願慈悲。證知護念。今有水陸飛行諸衆生。爲他網捕。將入死門。弟子某等。發慈悲心。學菩薩行。贖其身命。放使逍遙。承順大乘經典。代爲懺悔。授

與三皈稱揚十號及說十二因緣。但以此類罪障深重。神識昏迷。不能了知。方等深法。仰乞十方三寶。威德冥加。令其開悟。早得解脫。佛子。念汝多生業重。墮在畜生。今爲汝等。對三寶前。發露罪愆。汝當志誠。隨我懺悔。

往昔所造諸惡業

皆由無始貪瞋癡

從身語意之所生

一切我今皆懺悔

罪從心起將心懺

心若滅時罪亦忘

心忘罪滅兩俱空

是則名爲眞懺悔 三遍

南無清涼地菩薩摩訶薩 三稱。七佛滅罪真言三遍。

唵。薩。鞞。巴。鉢。月。斯。普。吒。怛。賀。囉。鞞。資。囉。耶。莎。訶。

諸佛子。汝等不聞三寶。不解皈依。所以輪迴三有。今墮畜生。我今授汝等

三皈依法。汝今諦聽。諸佛子等。皈依佛。皈依法。皈依僧。三說。皈依佛。兩足尊。